

Suliffissarsiortunut ikiorsiissutit pillugit Inatsisartut Inatsisaat

Kapitali 1

Atuuffa

§ 1. Inatsisartut inatsisaanni uani pineqarput inuit suliffissaaleqisut sulilernissaminut piareersimasut.

Imm. 2. Suliffissaaleqisutut sulileriaannaasutut isigineqassaaq inuk suliffeqalernissaminut piareersimasooq, siumoortumillu immikkut suliniuteqarfigineqaqqaarani sapaatip akunneranut minnerpaamik akunnerni 20-ini suliffeqalersinnaasoq.

Imm. 3. Suliffissarsiortunut ikiorsiissutit aningaasarsiatigut nammineq pisuussutiginnisamik isertitaqannginnermut taartisiatut akilerneqartarput, tamatumani aamma angerlartitaagallarnermi, napparsimanermi aammalu pinngortitami ajunaarnersuaqarnerani.

Imm. 4. Naalakkersuisut ersarinnerusunik tulluarsaqatigiinnut immikkoortitserisarnertit pillugit malittarisassiorsinnaapput.

§ 2. Inatsisartut inatsisaanni matumani pineqanngillat inuit namminersortutut inuussutissarsiuteqartut.

Imm. 2. Inatsisartut inatsisaanni matumani pineqanngillat inuit pinerluttaalisitsinnermut atatillugu imaluunniit isumaginnittoqarfimmit inissiisarfinnut inissinneqarsimasut.

§ 3. Suliffissarsiorunut ikiorsiissutisinissamut pisinnaatitaaneq atorunnaassaaq aningaasarsiatigut isertitaqannginneq pisortani inatsisinik imaluunniit namminersortunut inatsisinik tunngaveqartumik, tamatumani aamma isumaqatigiissutisigut, sillimmasiinernik imaluunniit sulitilluni ajoqusersinnaanermut sillimmasersimanermik tunngaveqartunik isertitaqannginneq matussuserneqartarpat.

Kapitali 2

Angerlartitsineq

§ 4. Angerlartitsinertut paasineqassaaq:

1) Sulisitsisup sulianik unititsigallarnera ullut 14-it angullugit sivilussuseqarsinnaasumik, nioqqutissiorneq nioqqutissiassaarunnikkut unitsinneqarpat, maskiinat ajoqusernerisigut, silamik allamilluunniit siumut naatsorsuutigineq ajornartumik peqquteqartumik.

2) Sulisitsisup sulianik unititsigallarnera toqqaannartumik pisortaniit ilitsersorneqarnermik imaluunniit peqquneqarnermik tunngaveqarpat.

Imm. 2. Sulisitsisoq ingerlaannartumik kommunalbestyrelsimut nalunaarusiussaaq sulisut

angerlartinneqarpata, soorluttaaq angerlartitsinermut pissutaasut uppersaaserneqassasut.

Imm. 3. Naalakkersuisut malittarisassiorsinnaapput sulisitsisup kommunalbestyrelsimut nalunaarusiortarnissaanut, aamma uppersaasiisarnissaanut angerlartitsinermut atatillugu imm. 2 naapertorlugu.

Kapitali 3

Piumasaqaatit nalinginnaasut

§ 5. Suliffissarsiortunut ikiorsiissutinik pisartagaqarsinnaaneq tungaveqassaaq pineqartup 18-inik ukioqalereersimaneranik, aalajangersimasumik najugaqartuuneranik aammalu Kalaallit Nunaanni inuit allattorsimaffiannut nalunaarsimaneranik.

Imm. 2. Inuit Kalaallit Nunaanni aalajangersimasumik najugaqaratik najuuttut, Kalaallit Nunaannilu inuit allattorsimaffiannut nalunaarsimasut aalajangersimasumik najugaqarfeqaratik, suliffissarsiortunut ikiorsiissutinik pisartagaqarsinnaatitaapput, kalaallinut inuiaqatigiinnut aalajangersimasumik atasuugunik.

Kapitali 4

Sulileriaannaaneq, suliffissarsiorneq aamma nuttarsinnaaneq

§ 6. Suliffissarsiortunut ikiorsiissutinik pisartagaqartoq sukkulluunniit suliartoqquneqarnissamut piareersimasussaavoq, pisussaaffeqarlunilu suliffissamik innersuunneqartumik tigusinissamik, suliffeqalernissamut sungiusaasarnernut neqeroorutigineqartartunut peqataasartussaalluni, allamik ilinniagaqartinneqarsinnaalluni, imaluunniit innersuunneqartumik pikkorissaqqinnermik tiguisussaalluni, kiisalu suliasamik sulisinnaanermut sungiusartinneqarnermut atatillugu tunniunneqartumik tiguisussaalluni.

Imm. 2. Suliffissarsiortunut ikiorsiissutinik pisartagaqartut Majoriami suliffissarsiortutut nalunaarsorsimassapput, eqeersimaartumillu peqataasassallutik kommunalbestyrelsimiit neqeroorutigineqartunut sulisinnaanngorsaanernut, pikkorissaqqinnermut, allamik ilinniagaqarnermut aamma tamatumunnga atatillugu sungiusaammik sulisarnermut, kiisalu Majoriamut ataatsimiigiaqquneqartarnerni eqeersimaarlutik peqataasassallutik.

§ 7. Suliffissarsiortunut ikiorsiissutinik pisartagaqartoq pisussaavoq eqeersimaartutut suliffissarsiortutut nalunaarsorsimanissamut www.suli.gl -imi, naammassillugulu suliaasumik atuuttumillu CV-mik peqassalluni.

Imm. 2. Suliffissarsiortunut ikiorsiissutinik pisartagaqartoq minnerpaamik sapaatip akunneranut ataasiarluni nalunaarsortittassaaq suliffissarsiortutut www.suli.gl -imi tamanut atuuttumik nammineq digitaliusumik ilisarnaatini atorlugu, imaluunniit Qitiusumik ingerlatsivimmi Majoriami nalunaarsortinnermigut.

§ 8. Suliffissarsiortunut ikiorsiissutinik pisartagaqartoq suliffissanut inuttaqanngitsunut suliffigissallugu periarfissaqarfigisaminnut qinnuteqartarnissamik pisussaaffeqarpoq.

Imm. 2. Suliffissarsiortunut ikiorsiissutinik pisartagaqartoq pisussaavoq suliffissami innersuunneqartumi sulilernissamut, ullormik ataatsimik siumut nalunaarfigineqarnermigut. Oqaaseqatigiit siulliit aamma

atuupput suliffissarsiortunut ikiorsiissutinik pisartagaqartumut sulisitsisumiit suliffissamik inuttaqanngitsumik neqeroorfigineqartumut.

§ 9. Kommunalbestyrelse qinnuteqartoq peqatigalugu tamakkiisumik isiginnittumik nalilersuisassaaq qanoq annertutigisumik qinnuteqartoq sulisinnaanersoq pillugu, minnerpaamik sapaatip akunneranut akunnerni 20-ini, imaluunniit ilinniakkamik aallartitsilluni, tamatumani aamma siumoortumik suliniuteqartoqarsimanissaa pisariaqartinneqarnersoq.

§ 10. Kommunalbestyrelsip suliffissarsiortunut ikiorsiissutinik pisartagaqartoq suleqatigalugu sapaatip akunnerisa 4-at ingerlaneranni suliarissavaa inummut pineqartumut iliuusissanut pilersaarussiaq. Qinnuteqartumik suleqateqarnermi isiginiarneqassapput qinnuteqartup pisariaqartitsineri aamma sunniuteqaqataanissaa akisussaaqataanissaalu, iliuusissamut pilersaarummik suliaqarnermut atatillugu.

Imm. 2. Iliuusissanut pilersaarummi piviusorsiortunik anguniakkanik iliuusissanillu nalunaarsuisoqassaaq, siunertaqartunik suliffissarsiortunut ikiorsiissutinik pisartagaqartup ilinniagaqarnissamut periarfissaqarnissaanik, imaluunniit suliassatigut - fagitigut piginnaanngorsaqqinnernik ingerlatsinissaanik, pitsanngorsaasunik ikiorsiissutinik pisartagaqartup ataavartumik suliffeqalernissaanut periarfissanik, kiisalu pisartagaqartup suliffeqarnermut attaveqarneranik nukittorsaasumik.

Imm. 3. Iliuusissanut pilersaarummi ilaassapput suliffissarsiortunut ikiorsiissutinik pisartagaqartup inissisimanera tamakkiisoq, tamatumani aamma ilaqutariinni pissutsit, ineqarneq, nappaatit aamma pissutsit allat qinnuteqartup suliffeqalernissamut periarfissaanut sunniuteqarsinnaasut.

Imm. 4. Kommunalbestyrelse inuusuttunut 18-29-inik ukiulinnut iliuusissanut pilersaarummik suliaqarnerni pingaartitsisassaaq anguniagassanik aamma iliuusissanik, annertunerpaatigut peqataasinnaasunik qinnuteqartup ilinniagaqarsinnaaneranut, imaluunniit ilinniagaqalernissamut periarfissaanut.

§ 11. Kommunalbestyrelsip iliuusissanut pilersaarummi suliffeerunnermi ikiorsiissutinik pisartagaqartoq pisussaaffilissavaa eqeersimaartumik peqataanissaanik, tamatumani aamma oqaloqatigiittarnerni, suliniutini pilersinneqartuni, sulisinnaanermik sungiusartitsinerni, inuttut ineriartortitsiviusunik pikkorissartitsinerni, suliassatigut, fagitigut pikkorissartitsinerni aamma suliffissamik innersuunneqartumik tiguisusssaaneranik.

Imm. 2. Pisartagaqartup iliuusissanut pilersaarussiaq isumaqatiginngippagu, imaluunniit iliuusissanut pilersaarusiame pisussaaffiliunneqartoq iliuusissaq aalajangersimasooq isumaqatiginngippagu, iliuusissaq pineqartoq taanna Pisortat ingerlatsineranni suliassat suliarineqartarnerat pillugu Inatsisartut inatsisaat naapertorlugu aalajangiinertut isigineqassaaq.

Imm. 3. Suliami peqataasup tusarniarneqartussaaneramik piumasaqaat taamaattoq atortinneqartussaassanngilaq pisartagaqartup ulluinnarmik sivisunerusumilluunniit ingerlatassanik pisussaaffilernerneqartarneraniit isigalugu. Oqaaseqatigiilli suilliit taamaattoq atortinneqassanngillat aalajangiineq § 13, imm. 1 aamma imm. 2 naapertorlugit suliaappat.

§ 12. Suliffissarsiortunut ikiorsiissutinik pisartagaqartoq pisussaavoq iliuusissanut pilersaarut naapertorlugu naammassillugulu iliuuseqarnissamut. Iliuusissanut pilersaarut nalilersoqqinneqartassaaq iluarsiivigineqartassallunilu pisariaqartitsineq naapertorlugu, minnerpaamik qaammatit

pingasukkaartumik.

Imm. 2. Iliuissannut pilersaarummik suliaqartoqartanngilaq inunnut suliffissarsiornermut ikiorsiissutininik pisartagaqartunut suliffimmiit angerlartinneqarallarnermi, takuuk § 4.

Imm. 3. Naalakkersuisut malittarisassiorsinnaapput iliuissannut pilersaarusiortarnermut, tamatumani aamma suliffissarsiorturnut piumasaqaatinik, suliffissanut innersuunneqartunut, sulisinnaangorsaalluni suliniutininik neqeroorutitut, allamik ilinniagaqartarnernut imaluunniit allatigut pikkorissaqqittarnernut, kiisalu napparsimanermut atatillugu katsorsartinnernut il.il.

§ 13. Inuit 18-29-inik ukiullit suliffissarsiorturnut nalunaarsorsimasut qaammatini 12-ini, pisussaapput qinnuteqassallutik tigusissallutillu piffissaq tamaat suliffissamik sumiiffiup angerlarsimaffigisap avataani. Kommunalbestyrelse assigisaanik najukkap angerlarsimaffigisap avataani piffissaq tamaat suliffissamik innersuussisinnaavoq.

Imm. 2. Assigisaanik imm. 1 atortinneqassaaq inunnut 30-inik sinnerlugillu ukiulinnut, suliffissarsiorturnut nalunaarsorsimareersimasunut qaammatini 24-ini.

Imm. 3. Kommunalbestyrelsillu aamma inuk pineqartoq pisussaaffilersinnaava, tak. imm. 1 aamma 2, allamik ilinniagaqarnermi peqataasussanngorlugu, sulilernissamut sungiusartitsisarnernut neqeroorutini peqataasussanngorlugu, imaluunniit pikkorissaqqinnissamik allamik innersuussinnaallugu angerlarsimaffigisap avataani, kiisalu pisussaaffilersinnaallugu angerlarsimaffigisap avataani sulissamik tigusinissaanik, sungiusaammik sulisitsinertut innersuunneqartumi, allamik ilinniagaqartitsiviusumi imaluunniit pikkorissaqqinnermik neqerooruteqarfusumi.

Imm. 4. Imm. 1 atortinneqassanngilaq periarfissaqanngippat inissamik naleqquttumik suliffissarsiorturnut pisartagaqartumut, taassuma aappaanut aamma meeraanut angerlarsimasunut 18-it inorlugit ukiulinnut pissarsiniarneq sumiiffimmi pineqartumi. Imm. 3 atortinneqassanngilaq inissamik naleqquttumik imaluunniit ineqarfissamik naleqquttumik innersuussisoqarsinnaanngippat, suliffissarsiornermut ikiorsiissutininik pisartagaqartumut.

Kapitali 5

Sulinngiffeqarneq

§ 14. Inuk qaammatini imminnut atasuni 6-ini suliffissarsiornermut ikiorsiissutininik pisartagaqarsimasooq, pisinnaatitaavoq isumaqatigiissuteqarnikkut sapaatip akunnerini 2-ini sulinngiffeqarsinnaanermut, pineqartup suliffissarsiornermut ikiorsiissutininik pisartagaqarfisinnaasaanik. Sulinngiffeqarneq Majoriamut isumaqatigiissutigineqassaaq, sulinngiffeqalernissaq sapaatip akunnerinik 4-nik sioqqullugu. Sulinngiffeqarneq ingerlanneqassaaq qaammatit tulliuttut 6-it ingerlaneranni. Inuup sulinngiffeqarnermini naammassisimassavai piumasaqaatit suliffissarsiorturnut ikiorsiissutininik pisartaqartussaananermut, kapitalimi 4-mi sulilernissamut piareersimasussaataitaneq taamaallaat pinnagu.

Imm. 2. Inuup pineqartup sulinngiffeqarnissani sulinngiffeqarnerisuteqarfusussaq pisinnaatitaaffigisimaguniuk, sulinngiffeqarneq taanna siulliullugu ingerlatissavaa. Sulinngiffeqarneq tamarmiusooq sulinngiffeqarnerisuteqarfusooq aamma suliffissarsiornermut ikiorsiissutininik pisartagaqarfusooq annerpaamik sapaatip akunnerinik 2-nik sivilissuseqarsinnaavoq.

Imm. 3. Inuk suliffissarsiorturnut sulinngiffeqartutut nalunaarsortissaaq www.suli.gl -imi imaluunniit

qitiusumik ingerlatsivimmi Majoriami. Inuk pineqartoq suliffissarsiortutut sulinngiffeqartutut nalunaarsorsimannikkuni sulilernissamut piareersimasutut isigineqassanngilaq.

Kapitali 6

Napparsimaneq

§ 15. Inuk suliffissarsiortunut ikiorsiissutininik pisartagaqarsinnaavoq napparsimanermini, kinguneqarallartumik maannamutut sulileriaannaannginnermik. Napparsimanerup nalaani suliffissarsiornermut ikiorsiissutininik katersisoqarsinnaavoq napparsimanerit ulluisa pingajuanniit, taamaattoq tak. imm. 3. Sulisinnaanerup periarfissaanngikkallarnerani nappaammik peqquteqartumik ilassusikkanik suliffissarsiornermut ikiorsiissuteqartitsisoqassaaq.

Imm. 2. Inuit imm. 1-imi pineqartunut ilaasut, kapitali 4 naapertorlugu piareersimasussaataitanermit pisussaaffeqanngikkallartarput. Ilassusikkanik suliffissarsiornermi tapiissutininik pisartagaqarsimagunik, piareersimasussaataitanerat taamaattoq aalajangiusimaneqarsinnaavoq.

Imm. 3. Napparsimaneq sap, ak. 2-nik sivilisunerusumilluunniit sivilissuseqarpat suliffissarsiornermut ikiorsiissutininik katersineq napparsimanerit ulluisa siullianniit aallartissaaq.

Imm. 4. Suliffissarsiornermi ikiorsiissutininik napparsimanerup nalaani pisartagaqarsinnaatitaaneq atorunnaartarpoq imminut ataannartunik piffissami qaammatinik 6-inik sinnerlugilluunniit sivilissusilimmi napparsimareermermi. Suliffissarsiortunut ikiorsiissutininik napparsimanerup nalaani pisartagaqarsinnaatitaanerli pigiinnarneqartarpoq suliffissarsiornermut ikiorsiissutininik pisartagaqartinneqartoq piffissap qaammatinik 3-nik sivilissuseqartup iluani naatsorsuutigisinnaappagu peqqissisutut oqaatigineqarsinnaalernissi, maannamutullu suliffeqaleqqissinnaalluni.

§ 16. Napparsimaneq kommunalbestyrelsimut nalunaarutigineqassaaq kinguarsaanertaqanngitsumik. Kommunalbestyrelse naliliippat nakorsamiit allagartaq pisariaqartoq, piumasaqartoqarsinnaavoq nakorsamiit uppernarsaammik. Nakorsamiit allagartami nalunaarneqarsimassaaq napparsimaneq piffissami tamakkiisumi imaluunniit piffissap ilaannaani pisuunersoq, aamma qaqugu pineqartup nalinginnaasumik suliffissamik tamakkiisumik isumaginnissinnaalernissaa naatsorsuutigineqarnerisigut. Nakorsamit allagartamut aningaasartuutit kommunalbestyrelsimiit akilerneqassapput.

Kapitali 7

Killilersuiffigisaalerneq

§ 17. Suliffissarsiortunut ikiorsiissutininik pisartagaqartoq sulilernissamut piareersimanngitsoq, tak. §§ 6-13, atorfimminniit soraarniuteqartoq imaluunniit suliffimminniit qimagutitaasut, ikiorsiissutisisinnaanerminniit killilersuiffigisaalertarpoq sapaatip akunnerini 4-ani.

Imm. 2. Soraarniuteqarneq tunngavilersorneqarpat sulisisisup peqqarniitsumik pissusilersorluni atorfeqarnermut atugassarititaasunik unioqqutitsineranik, imm. 1 atuutissanngilaq. Imm. 1 aamma atuutissanngilaq inuup pineqartup eqqartuussinikkut, akerleriissutaasut sularineqartarfianni aalajangiinikkut, allatigut iliuuseqarnikkut imaluunniit pituttuisuusumik isumaqatigiissuteqarnikkut aalajangiunneqarpat suliffimmiit qimagutitaaneq tunngavissaqanngitsoq. Suliffissarsiortunut ikiorsiissutit utimoortumik tunniunneqassapput, tak. taamaattoq § 3.

Imm. 3. Suliffissarsiortunut ikiorsiissutit piffissami killilersuiffigisaasumi ikiorsiissutinit pisinnaatitaaffittut maannamut tunniunneqartartuniit 50 % -iusarput. Suliffissarsiortumut ikiorsiissutininik annikillisisineq kinguneqartanngilaq pisartagaqartup pisussaaffinik Inatsisartut inatsisaat manna naapertorlugu allannguinerik.

§ 18. Suliffissarsiortunut ikiorsiissutininik inuk pisartagaqartoq killilersuiffigisaalersimaguni sisamariarluni, qaammatit 12-it imminnut atasut iluanni, taava pineqartoq sulilernissamut piareersimasutut isigineqarunnaassaaq, suliffissarsiortunullu ikiorsiissutininik tamakkiisunik pisartagaqarsinnaajunnaassalluni. Inuk pineqartoq suliffissarsiortunut ikiorsiissutininik annikillisanik ikiorsiissutisissaaq, tak. § 17, imm. 3, qaammatini 3-ni pisartagaqarsinnaajunnaarnerup qaangiunneranniit, § 17, imm. 1 naapertorlugu.

Kapitali 8

Suliffissarsiortunut ikiorsiissutisinnaanermik katersisarneq

§ 19. Inuit suliffissarsiortunut ikiorsiissutisiassaminnik katersilersarput ullormiit saaffiginniffiminniit, tak. taamaattoq imm. 2 aamma 3.

Imm. 2. Inuup ulloq saaffiginniffigisani sap. ak. sioqqullugu aningaasarsiaqarnini annaasimappagu ulloq taanna tunngavigineqassaaq, ulloq saaffiginniffusoq pinnagu.

Imm. 3. Inuit akissarsiaqarfigisaminnik suliffeqareersimanngitsut suliffissarsiortunut ikiorsiissutininik pisartagaqalersinnaanerminnut katersisarput sapaatip akunnerini 2-ni, kommunalbestyrelsimut suliffissarsiortutut nalunaarnerminniit (ulloq saaffiginniffik)

Kapitali 9

Suliffissarsiortunut ikiorsiissutit aningaasartaat

§ 20. Suliffissarsiortunut ikiorsiissutit procentiat naatsorsorneqartarpoq sulinermik inuussutissarsiuteqartunut suliamik ilinniagaqarsimanngitsunut isumaqatigiisummi minnerpaamik akunnermusiat aamma sulinermik inuussutissarsiuteqartunut suliamik ilinniagaqarsimasunut akunnermusiat, SIK-ip aamma Naalakkersuisut akornanni isumaqatigiissut naapertorlugu.

Imm. 2. Akiliutissap procentia sapaatip akunnerini 26-ini siullerni minnerpaamik akunnermut akissarsiat 90 % -iannik annertussuseqarpoq. Tamatuma kingorna akunnermusianiit procentiat 80 % -imut apparneqassaaq.

Imm. 3. Inunnut 18-29-inik ukiulinnut suliffissarsiornermut ikiorsiissutininik pisartagaqartinneqareersimasunut qaammatini 12-ini, akissarsiat minnerpaaffissaannit procentia 65 % -itut annertussuseqalertarpoq.

Imm. 4. Inunnut 30-inik ukiulinnut ukioqqortunerusunullu katillugit qaammatini 24-ini suliffissarsiornermut ikiorsiissutininik pisartagaqareersimasunut procentia akunnermusiat 65 %-ianut annertussuseqarpoq.

§ 21. Naalakkersuisut quppersakkaminni tamanut takusassiarisassavaat § 20, imm. 1-4 naapertorlugit akiliutit annertussusissaat.

§ 22. Suliffissarsiortunut ikiorsiissutininik tunniussisoqartassaaq qinnuteqartup akunnermusiaanik tunngavilimmik. Akunnermusiaq naatsorsorneqartassaaq qinnuteqartup agguaqatigiissillugit akunnerit sapaatip akunnerini kingullerni 13-ini suliffissarsiortunut ikiorsiissutininik qinnuteqannginnermini suliffigisimasai tunngavigalugit, taamaattoq sapaatip akunneranut minnerpaamik akunnerit 22-it. Annerpaamik suliffissarsiortunut ikiorsiissutininik akiliisoqarsinnaavoq sapaatip akunneranut akunnermusiaq akunnernut 40-nut naatsorsugaasoq tunngavigalugu.

Imm. 2. Nalunaaquttap akunnerinut aningaasarsiaqarfiusunut ilaatinneqassapput piffissat pineqartup angerlartitaaffigisimasai, tak. § 4, aamma piffissat qinnuteqartup suliffigisimanngisai kisiannili akissarsiaqarfigisimasai imaluunniit allatigut pissarsiffigisimasai, tamatumani aamma sulinngiffeqarneq akilerneqartoq, ullut napparsimaffiusut akilerneqartut aamma meeqqap napparsimaffia, pikkorissarnernut peqataaneq, nal. ak. akissarsissutissanik afspadseeriineq assigisaaluunniit.

Imm. 3. Inuit sioqqullugu akissarsiorfigisaminnik suliffeqarsimanngitsut suliffissarsiornermut ikiorsiissutininik sapaatip akunneranut akunnernut 22-inut naatsorsugaasunik akilerneqartassapput.

§ 23. Siumoortumik qinnuteqarnikkut ilassutitut suliffissarsiornermi ikiorsiissutininik tunniussisoqarsinnaavoq, piffissap ilaannaani suliffeqarnermi annerpaamik sapaatip akunnerinik sisamanik sivilussuseqartuni, piffissap qaammatinik tulleriinnik arfnilinnik sivilussuseqartup iluani.

Imm. 2. Ilassutitut suliffissarsiornermi ikiorsiissutit piumasaqaatitaqarput ikiorsiissutininik tiguisussap sulilernissaminut piareersimanissaanik, tak. kapitali 4.

Imm. 3. Piffissaq suliffissarsiornermi ilassutitut ikiorsiissutininik pisartagaqarfusoq tiguisussap iliuusissanut pilersaarutaani ilaariissaaq, siunertaqassallunilu pineqartup aalajangersimasumik suliffeqalernissaanik.

§ 24. Suliffissarsiortunut ikiorsiissutininik pisartagaqartartoq ulluni ataasiakkaani akissarsiortarsimappat, suliffissarsiornermut ikiorsiissutit annikillineqartassapput nalunaaquttap akunnerinik aningaasarsiorfiusunik.

§ 25. Suliffissarsiortunut ikiorsiissutit kingumoortumik tamatigut ullut 14-ikkaartumik akilerneqartassapput. Suliffissarsiornermut ikiorsiissutit kommunalbestyrelsimit kommunimi sulinermik inuussutissarsiuteqartup inuit allattorsimaffianni nalunaarsugaavigisaani akilerneqartassapput.

Imm. 2. Kommunit agguarnerisa avataaniittunut inunnut naalakkersuisoqarfik sulisoqarnermut akisussaasuusoq suliffissarsiornermut ikiorsiissutininut aningaasartuutit ingerlatissavai, tak. § 30, imm. 2.

Kapitali 10

Qanoq sivilutigisumik suliffissarsiortutut inissisimaneq

§ 26. Suliffissarsiortutut qanoq sivilutigisumik inissisimaneq naatsorsorneqartassaaq siullermeersumik suliffissarsiornermi ikiorsiissutininik akiliisoqarneraniit, piffissamut suliffissaaleqisup suliffissarsiornermi ikiorsiissutininik pisartagaqarunnaarfigisaanut, suliffeqalernermik pissuteqartumik. Nutaamik suliffissarsiortunut kommunalbestyrelsimi nalunaarsorsimaleqqinnermi, suliffissarsiortoq nutaamik nalunaartutut nalunaarsorsimalissaaq, tak. taamaattoq imm. 3.

Imm. 2. Imm. 1 naapertorlugu qanoq sivilutigisumik suliffissarsiortuusimanerup naatsorsorneqarnerani ilanngunneqassaaq piffissaq ilassutitut suliffissarsiortumut ikiorsiissutininik akiliuteqarfiusartoq.

Imm. 3. Suliffissarsiortutut ikiorsiissutininik pisartagaqartoq nalunaarsimappat suliffissarsiortuujunnaarluni, taavali sulii sapaatip akunneri 12-it qaangiutinngitsut nutaamik suliffissarsiortutut kommunalbestyrelsimut nalunaarluni, pineqartoq nutaamik nalunaartutut isigineqassanngilaq. Suliffissarsiortorli sulii suliffissarsiortutut allannguuteqanngitsumik sivilussusilittut nalunaarsorsimaannassalluni imm. 1 malillugu.

Kapitali 11

Paasissutissiinnissamut pisussaaffik

§ 27. Suliffissarsiortutut ikiorsiissutininik pisartagaqartoq pisussaavoq kommunalbestyrelse ilisimatittassallugu atugarisamini allannguutit suliffissarsiortumut ikiorsiissutininik pisartagarisaminik allannguutaasinnaasut pillugit, atorunnaarsitsisinnaasut imaluunniit utertitsilluni akiliuteqartussanngorsinnaanermut pissutaasinnaasut pillugit.

§ 28. Kommunalbestyrelse siuumoortumik qinnuteqartumiit imaluunniit ikiorneqartumiit akuersisitsereernikkut piumasaqarsinnaavoq pisortatut oqartussaasut allat pineqartoq pillugu paasissutissanik tunniussaqaassat, suliffissarsiortutut ikiorsiissutininik tunniussisinnaanermut suliaq suliarineranut pisariaqarsinnaasunik. Tamanna aamma atuuppoq ilinniartitaanernut ingerlatsivinnut, napparsimmavinnut, nakorsanut, tarnip pissusaanik immikkut ilisimasalinnut, peqqinnissamik suliaqartunut akuerisaasunut allanut, aamma inunnut pineqartunut akisussaasunut sinnerlugulu sulisunut, aningaaserivinnut, sulisitsisunut aamma namminersortunut pisortat ingerlatsiviinik sullissisuusunut. Tamannalu aamma atuuppoq paasissutissanut inummut pineqartumut taamaallaat tunngasuusunut atatillugu, aammalu paasissutissanut isortuussaasunut tunngatillugu, soorluttaaq pisortat nakorsap pineqartumut allattugaataanik, napparsimmaviup allattugaataanik imaluunniit tamakkua anillatsinneqarnerinik piniarsinnaasut.

Imm. 2. Kommunalbestyrelsip pineqartumit akuerineqaqqaarani suliami ataatsimi suliamut atatillugu imaluunniit nakkutilliinermut atatillugu piumasarisinnaavai paasissutissat pisortatut oqartussaasunit allaniit, aningaasanut tunngasuni aamma sulinngiffeqartarnermut tunngasuni, pineqartumut ikiorserneqarnissamik qinnuteqartumut atatillugu.

Imm. 3. Kommunalbestyrelsip innuttaasumit akuerineqaqqaarani piumasarisinnaavai paasissutissat pisariaqartut aningaasaqarnermut attuumassuteqartut aningaaserivinniit aamma sulisitsisuniit, suliffissarsiortumut ikiorsiissutininik nakkutilliinermut atatillugu.

Imm. 4. Qinnuteqartoq akuersinngippat kommunalbestyrelsip paasissutissanik piniarsinnaaneranut imm. 1 naapertorlugu, suliaq paasissutissat pigineqartut tunngavigalugit suliarineqassaaq, paasissutissat pineqartut, tak. imm. 2, akuersissutitaqanngitsumik aaneqarsinnaanngippata.

Kapitali 12

Utertitsilluni akiliineq

§ 29. Kommunalbestyrelse aalajangertussaavoq eqqunngitsunik tunngaveqartunik ikiorsiissutininik tunniussisoqarsimanerani, Inatsisartut inatsisaat manna naapertorlugu utertitsilluni akiliinissamik, imaappat, ikiorsiissutininik pisartagaqartoq:

- 1) Kommunalbestyrelsimut paasissutissanik apuussinaveersaarsimappat, tak. § 27.
- 2) Pissutsit nalunngikkaluarlugit Inatsisartut inatsisaat manna naapertorlugu ikiorsiissutininik tigusaqarsimappat.
- 3) Kingusinnerusukkut taarsiissutissanik akiliivigineqarsimappat, ikiorsiissutininik allaniit akilernerqarsimappat assigisaanilluunniit aqqusaagaqarsimappat, piffissami suliffissarsiornermut ikiorsiissutininik pisartagaqarfusimasuni siunertaasunut naapertuuttunik akilernerqarsimasunik.

Kapitali 13

Aningaasalersuineq aamma allaffissorneq

§ 30. Kommunalbestyrelsip Inatsisartut inatsisaat una tunngavigalugu suliassanik allaffissornikkut ingerlatsineq isumagisaraa.

Imm. 2. Inatsisartut inatsisaat una naapertorlugu ikiorsiissutininik pisartagaqarnissamut qinnuteqaat kommunimi aalajangersimasunik ineqarfigisami, imaluunniit aalajangersimasunik najukkami, tunniunneqassaaq. Inuit kommunit aggorneqarsimanerisa avataani aalajangersimasunik najugaqartut qinnuteqaammik Naalakkersuisunut tunniussisussaapput.

Imm. 3. Inunnut nunap kommuninut aggorsimanerisa avataaniittunut Naalakkersuisut piginnaatitsisinnaapput pisortatut oqartussaasunik allanik Inatsisartut inatsisaata matuma atortinneqarneranut atatillugu.

§ 31. Inatsisartut inatsisaat manna naapertorlugu aningaasartuutit kommunalbestyrelsimut akilernerqassapput. Aningaasartuutit inunnut § 30, imm. 2, oqaaseqatigiit aappaat naapertorlugu pineqartunut Naalakkersuisunit akilernerqassapput.

Imm. 2. Suliffissarsiornermut ikiorsiissutininik pisartagaqartoq kommunimiit nuuppat iliuusissanut pilersaarummik suliaqartoqareernerani, kommunip nuuffiusup iliuusissanut pilersaarusiaq kommunimut qimatamut piniassavaa, naleqqussassallugulu taanna pisariaqassusia naapertorlugu, suliffissarsiornermut ikiorsiissutininik pisartagaqartoq kommunimi nuuffigisamini saaffiginnippat. Kommuni qimanneqartoq iliuusissamut pilersaarummik kommunimut nuuffiusumut nassiussaqaassaaq, tamanna piumasarineqarniariapat.

Kapitali 14

Ataatsimoorussanik IT-mi aaqqissuussinerit

§ 32. Kommunit aamma Naalakkersuisut ataatsimoorussaminnik IT-mut atatillugu atortorissaruteqassapput, Inatsisartut inatsisaat manna tunngavigalugu allaffissornerminni atugassaminnik.

Kapitali 15

Naammagittaalliutit

§ 33. Kommunalbestyrelsi Inatsisartut inatsisaat una naapertorlugu aalajangiinermi suliaassanngortinneqarsinnaapput Isumaginninnikkut Maalaaruteqartarfimmut, Isumaginnittoqarfiup aqunneqarnera aaqqissuussaanelu pillugit Inatsisartut peqqussutaanni aalajangersakkat naapertorlugit.

Imm. 2. Kommuninut nunatta aggorneqarnerisa avataanni inunnut aalajangersimasumik najugaqartunut imaluunniit najugaqarallartunut tunngatillugu aalajangerit Naalakkersuisunit imaluunniit Naalakkersuisunit piginnaatinneqartunit suliarineqartut Isumaginninnermut Maalaaruteqartarfimmut suliaassanngortinneqarsinnaapput.

Kapitali 16

Atortuulerneru aamma ikaarsaariarnermi aalajangersakkat

§ 34. Inatsisartut inatsisaat una atortuulerpoq ulloq 1. januar 2023.

Imm. 2. Ilutigisaanik atorunnaarsinneqarpoq Suliffeerunnermi ikiorsiissutit pillugit Inatsisartut inatsisaat nr. 2, 15. maj 2014-imeersoq.

§ 35. Inuit Inatsisartut inatsisaata matuma atortuulernerani suliffeerunnermi ikiorsiissutinik pisartagaqartut ingerlaannartumik suliffissarsiornermi ikiorsiissutinut nuutsinneqassapput, Inatsisartut inatsisaanni uani aalajangersakkat naapertorlugit.

Imm. 2. Iliuusissanut pilersaarutit atuuttuusut Suliffeerunnermi ikiorsiissutit Inatsisartut inatsisaat nr. 2, ulloq 15. maj 2014-imeersoq naapertorlugu, allannguuteqaratik Inatsisartut inatsisaat una naapertorlugu atortinneqassapput. Kommunalbestyrelse Inatsisartut inatsisaata matuma atortuulerneraniit ukioq ataaseq qaangiutsinnagu iliuusissanut pilersaarutinik nutarteraluni malinnaatitsisassaaq, inunnut suliffeerunnernut ikiorsiissutinik pisartagaqarsimasunut suliffissarsiornermilu ikiorsiissutinik pisartagaqalersunut.

Namminersorlutik Oqartussat, ulloq 20. juuni 2022

Múte Bourup Egede
Naalakkersuisut Siulittaasuut

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut